



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 7

Yangia anidakangma :

f Tir Yimym

Instagram tiryimym@aolima

YouTube tir yimym

TAPAK 6

Chinese military forum nung
China aser Russia-i US aitsü

Dy. CM Tynsong-i Meghalaya NPP
president inyaker



VOL. XXI NO. 24 (ADOK 24) DIMAPUR RASEMNÜ (WEDNESDAY) YIMPOKSÜI (NOVEMBER) 01, 2023 ₹ 5.00

Toshiba-i Lanu Toy nem tetushi agütsü NE nem Rs 3 lakh crore alang NH projects agütsü: Nitin Gadkari



Toshiba ESS President & CEO Yotsuyanagi-i Lanu Toy nem kulikaket ka agütsü dang agiba noksa angur.

Kohima, October 31, 2023 (DIPR): Nagaland nung Lanu Toy-i electrical engineer ka ama inyaka arundang mapa aika inyaktetba atema tenüngsang agütsü.

Lanu Toy ya 1927 nung aso aser pai Chief Electrical Engineer ka ama inyaka sorkar mapa nungi anisüngzük angu.

Barapani, Meghalaya nung Umiam Stage-I Hydroelectric Power Project inyakba nung pai tongti shilem agia liasü aser pai mapa balala inyakba ajanga Northeast nung azükaru bentsür aruogo.

1961 küm Lanu Toy-i mezüng Japan-i ao aser idangji pai Toshiba nung ita trok training programme nung aden.

Iba mapang pai Toshiba 9MW turbine power generation unit angazük aser iba ya Umiam Stage-I Hydroelectric Power Project nung amshia lir.

October 11, 2023 nü Lanu Toy-i Japan semdangi aodang Toshiba ESS (Energy Systems

and Solutions) kettangsur Yotsuyanagi den ajurutepa liasü.

Iba mapang pai Toshiba nungi shisatsü anguba aser inyakyim jenti angazükba indang lemsatop.

Toshiba training nung adandang Japanese mapa inyaksangshi aser sobaliba angatetba indang Lanu Toy-isa ashi.

Iba ajanga Japan nungeri technology tsütsü mapa tulu inyakteta aoer ta pai Yotsuyanagi dang ashi.

Lanu Toy-i mapa jenti inyaka aruba atema Yotsuyanagi (ESS)-i tetushi agütsü aser Toshiba-i maneni technology maparen ajanga India ajangzüksü asoshi mapa inyaksü jangraba metetdaksü.

1965 nungi Toshiba-i India nem hydropower turbines set 24 aser generators 34 agütsüogo aser iba ajanga India indang hydropower generation sector nung Toshiba-i shilem agiba kuli agütsü ta Yotsuyanagi-isa metetdaksü.

Guwahati, October 31, 2023

(Agencies): Tesüiba küm 10 tsüingda Northeast nung Rs 3 lakh crore indang national highway mapatong balala lemküksüogo ta Union Road Transport Minister Nitin Gadkari-i tanü ashi.

October 31, 2023 nü Guwahati nung osangbener den jembidang “iba ajanga northeast region nung National Highways 45% agi talangba kümogo” ta Gadkari-i ashi.

“Ajisüaka, Nagaland aser Meghalaya ama northeast state kar nung ali tsütsü khuret ajurua lir aser item ken o tem mebentetra mapatongtem agienadoktsü” ta paisa ashi.

“Tesüiba küm 10 tsüingda NE nem Rs 2,89,425 crore indang mapatongtem agütsüogo. Iba nung inyaksü alibatem, tang teinyakdak aser renemadoker aliba mapatongtem dena lir” ta Union Minister Gadkari-i ashi.

2014 tashi Northeast nung national highways 10,800 km shi liasü saka tang 15,740 km kümogo ta paisa shisem.

Tanü Gadkari-i North-eastern region nung National Highway projects indang meyipa reprangshiba senden ka amen.

Iba senden nung Union MoS General VK Singh, Northeast state ajak nungi Chief Minister tem aser NHIDCL kettangsurtem aden.

Sorkar aser senso ajaki lendong anema inyaksüla: Maj. Gen. Sudir Bahl

Kohima, October 31, 2023 (TYO): Alima lendong anema raratsüba ya sorkar kija masü saka nisung ajak indang tebilemsü khuret lir ta National Disaster Management Authority (NDMA) nung Senior Consultant (ME&IRS) Maj. Gen. Sudir Bahl (Retd)-i ashi.

Nagaland State Disaster Management Authority (NSDMA)-i Nagaland Emergency Preparedness Exercise (NEPEX) ayonga agiba nung tongti shisalen sayurji Maj. Gen. Bahl liasü.

Nagaland ya menoknok kanga anokba tesem ka lir anungji nisungtemi ki yangluba menoknok nungi jenbutüsü yanglutsüla ta pai ashi.

Nisung ajaki terenlok mapa inyakba nung rules aser guidelines sülen anidaksüla aser

tzümet süng o tanga lendong ataloktsü ta meteta aliba tesemtem atsünga magitsüla” ta Maj. Gen. Bahl-isa shisem.

“Nagaland Fire Safety Bill mapa tenzükogo anungji public-i fire safety telatetbatem sülen anidaksüla. Ki yanglur ajaki fire safety norms ama inyaksüla ta iba Act nung lateta lir” ta Joint CEO NSDMA Johnny Ruangmei-i ashi.

“Kohima nung kitsükkirong lendong aika atalokogo anungji asenoki tansütsü agitsüla” ta pai ashi.

“State sorkari new building bye-laws yangludar aser ibaji mulunga agizükba sülen mapa kuma inyaksü. Kiojen tejentem asoshi retrofitting technologies kar benoktsüla aser mi ensepba garitem tiptema senzütsü asoshi lenmang temesütem ulushitsüla”

ta Johnny Ruangmei-isa metetdaksü.

Kümshia NEPEX ajanga Nagaland nung alirtem angazük aser iba ya NSDMA indang tongtipang mapa ka lir, ta paisa ashi.

“Kümshia asenoki metokmeperitem ajiteta tajungba kuma arur saka lendong tulu asoshi renema lir ta meshitet, kechiyong alima lendongji nisungtem masadangtet” ta Johnny-isa ashi.

NSDMA-i Nagaland state ajungalen November 2 anepang 9:00 ako nungi tenzük 7.1 magnitude menoknok anoker ama trokbuba NEPEX agitsü, ta paisa metetdaksü.

Iba exercise nung sorkar department tem den Village Disaster Management Authorities (VDMA) kari shilem agitsü, ta paisa ashi.

Nagaland ya ‘multi-hazard prone state’ lir: Nagaland Disaster Statistics

Kohima, October 31, 2023 (TYO): India nung Nagaland ya multi-hazard prone state tem rongnung ka lir aser menoknok, anentsüh, tzümet süng, yipru, rü aser tzünglu tashii aruba den tzi akongba mesüra morok mi lendongtem ajurutsü ana nung lir.

Iba ya Directorate of Economics & Statistics (E&S) indang Nagaland Disaster Statistics mezüngbuba report nung shia lir.

“Kümtem süia arundang Nagaland sorkari tayongzükba aika ajurua aruogo ajisüaka lendong balala asadangtsü, bendentsü aser shisadangtsü maparen shitak maliba ajanga tetsükdaksü ajurua arur. Anungji lendong asoshi systematic data aser noktangtsüba atema sorkari süoki ia bilemer” ta Nagaland Disaster Statistics nungsa shia lir.

Natural aser Man-made (human induced) disasters kettangtsütsü atema analytical data nungdaker ta report nungsa shia lir.

High Power Committee on Disaster Management ajanga ashiba nung ajemdaker iba report

ya shilem pungu lemsar agütsüogo.

Water and climate related disasters:

2020-21 tsüingda Nagaland nung tzünglu kanga aruba, tzümet süng, anentsüh aser yipru ajanga shiruru 1437 aser an 2990 asü. Ajisüaka 2021-22 tsüingda Dimapur district nung shiruru 1051 aser an 2290 asü.

2018-19 tsüingda tzümet süng aser ali anenzüka aodang irrigation channels 89 (5.95 kilometers) raksa. Iba takoksa ya Wokha aser Mokochung district tem nung teimba ajuru.

2019-20 tsüingda lendong balala ajanga ali hectare 1210.16 nung tsünusenbongtsü raksa. 2021-22 tsüingda tsüingsarusa ajuruba ajanga ali hectares 104052.95 nung tsünusenbongtsü raksa.

2019-20 tsüingda yipru aser rü tsükba ajanga acres 680 nung tsünusenbongtsü raksa. 2020-21 tsüingda ali 1169.41 acres aser 2021-22 tsüingda ali 5451 acres nung lendong balala ajanga tsünusenbongtsü raksa.

2020-21 tsüingda High

Tension Lines 6 (189 kilometers) nung timtem adok aser iba ajanga substations 10 nung kongshi. Ano, 2021-22 nunga High Tension Lines 8 (233.8 kilometers) raksa aser idangji substations 13 nung kongshi.

Geological related disasters:

Nagaland nung anentsüh ajanga meimchir dak dang masü saka shiruru asoshi timtem bentsür aruogo. 2021-22 tsüingda anentsüh ajanga shiruru 18 dak kongshi aser Noklak district nung shiruru 9 asü.

Tzünglu kanga aruba aser anentsüh ajanga Nagaland nung transmission lines, towers, distribution towers aser transformers raksaogo.

Kiphire aser Zunheboto district tem nung tzünglu aser anentsüh ajanga alu nung timtem ajuru. Maneni 2021-22 tsüingda tzünglu kanga aruba ajanga National Highway Road nung teraksa jenti ajurua liasü.

Accident related disasters:

2021-22 tsüingda kitsükkirong lendong 83 tashi ataloka liasü. Iba nung dokan 78, hotel ka aser shishilembaba

ki 4 rongdok. Kitsükkirong lendong ya Dimapur nung teimba ataloka liasü.

2019-20 nungi 2021-22 tsüingda electrocution ajanga nisung 43 asüba osang lir.

2019-20 tsüingdang morok mi ajanga kozüdong ali acre 10 nung 7000 shi rongdok. 2020-21 tsüingda morok mi ajanga ali acre 24.7 nung coffee tedong 19880 rongdok.

Biological related disasters:

2020-21 tsüingda Department of Health and Family Welfare-i nisung 12,882 diarrhea agi aser nisung 183 dysentery agi timtemba record süa lir. Ajisüaka 2021-22 tsüingda COVID-19 wara ajanga diarrhea agi shiranger 2878 dang liasü.

2019-20 aser 2020-21 tsüingda Nagaland nung malaria, dengue, AES aser scrub typhus agi timtemer aika liasü. 2021-22 nungbo malaria, dengue aser scrub typhus agi shiranger tem ajema aküm.

India nung tanga state tem ama Nagaland nung COVID-19 wara agi kongshi. 2020-21

tsüingda nisung 10,312 dak COVID-19 putet aser nisung 79 asü. COVID-19 agi asür teimba Dimapur district nung liasü. 2021-22 nunga nisung 20,274 dak COVID-19 putet aser nisung 607 asü.

Pest attacks and diseases:

2019-20 tsüingda Nagaland nung ali acre 1200 nung kongshia liasü. 2020-21 nungbo ali acre 598 nung dang kongshi saka 2021-22 tsüingda ali acre 950 aküm. Küm asem tsüingda Dimapur district nung ali te Department of Agriculture-i 2020-21 tsüingda alu aika nung mesen agi timtem agütsüba osang lir. Iba mapang Wokha aser Mon district tem nung alu hectares 49,448.85 nung kongshia liasü.

Nagaland State Disaster Management Authority (Home Department)-i ayonga agiba Nagaland Emergency Preparedness Exercise (NEPEX) sentong nung Directorate of Economics & Statistics (E&S) ajanga Nagaland Disaster Statistics mezüngbuba report sayaogo.

Raj Bhavan nung Rashtriya Ekta Diwas amung



Dimapur, Mongputeni/Oct. 31 (TYO): Nagaland Angh La Ganesan den Raj Bhavan nung ketdangsür aser staff temi October 31, 2023 anepdang 10:45 ako nung Drawing Room, Raj Bhavan nung Rashtriya Ekta Diwas munga liasü.

India nung mezüngbuba Deputy Prime Minister aser 'Iron man of India', Sardar Vallabhai Patel asoba anogo nung Rashtriya Ekta Diwas ya amunger.

Raj Bhavan nung iba

anogomung bilemteta sentong tatsüka agidang naro inoktsüba den külemi Sardar Vallabhai Patel ama mezüngpuri telesa makai shilem agiba ajanga tanü India iba jenjang nung nokdaka lir, ta Angh-i ashi.

Sardar Patel ya takum ali asübo kanga pela lila, kechiaser pa mangdang aser inyaksangshi agi India linük melenshitsü, ta ashi.

Sardar V Patel-i takok anguba aser nüjiso anguba linük tasen lungjemba nung tongti shilem agiba indang Section Officer

Jochule-ia lemsatepa liasü.

Pai tasü tait mera agiba, tesendaktep nung tashi aitba aser lenir sempet aliba ajanga state tilala noklang junga lemsar yimsü süa aliba ajaki Indian Union nung adentsü molung. Iba anogo nung asenoki telungjem, terenlok aser linük kumzüka ayutsü lenmang bushir.

Iba sentong nung Secretary to Governor, Rajesh Soundararajan, IAS ajanga Rashtriya Ekta Diwas tezüngzüktep agia liasü.

Fazl Ali College nung United Nations Day amung

Dimapur, Mongputeni/Oct. 31 (TYO): United Nations Day nüngtem nung Department of Political Science, Fazl Ali College, Mokokchung ajanga 5th Annual Lecture sentong Conference Hall, FAC Mokokchung nung ayongzüka liasü, kong o jembir Dr. Deepak Bhaskar, Assistant Professor, Dept. of Political Science, Nagaland University liasü.

Vinod Kumar, Vice-Principal, FAC ajanga tarur ajak pela agizük aser Department of Political Science ajanga annual lecture series ayongzüka atema tenüngsang agütsü aser reju balala nungi tashi temeter jaokba ajanga asen shisatsü arener ta ashi.

Iba amala sentong ya ajanga angazükba tsütsü college tajung kumdaksür ta pai ashi aser pai anir sentong nung adenertem Rashtriya Ekta Divas pledge agia liasü.

Sentong nung o jembir Dr.



United Nations Day nüngtem nung Department of Political Science, Fazl Ali College, Mokokchung ajanga October 31, 2023 nü ayongzüka 5th Annual Lecture nung Dr. Deepak Bhaskar, Assistant Professor, Dept. of Political Science, Nagaland University ajanga jembidang tangokba noksa nung angur.

Deepak Bhaskar, Assistant Professor, Dept. of Political Science, Nagaland University ajanga "Democracy,

Hegemony and War: A critical analysis of UN in 21st Century" onük nung ajemdaker jembia liasü.

Pa onük jembia tenzükdang alima ya yimjung dang nungi tali raraba tensa nung lir, ta Dr. Bhaskar-i ashi.

"Taoba mapang ama masü tang asenok aliba alima ya yimjung ajema kumogo. Rara maliba tesem kecha nunga mali," ta pai ashi.

Democratization melenshir aser alima ya tesama leni aor aser alima tesem ajungalen anti-democratization ataloker, kong tebilemtsü aser rara tali akumer aser item tebilemtsü koktetba tashi ajema aor, ta pai ashi.

Alima nung tashi tait linük temi rara ama tensa adokdaksütsü asoshi UN ya hadir ka ama amshiba indang pai jembia liasü.

Pai UN report balala asadanga jembia aser United Nations inyakyim indanga asadanga liasü.

Mokokchung nung National Unity Day amung



Rashtriya Ekta Diwas 2023 (National Unity Day 2023) nüngtem nung Mokokchung jila nung October 31, 2023 nü "Run for Unity" nung shilem agirtem tangokba noksa ka yangi angur.

Dimapur, Mongputeni/Oct. 31 (TYO): Beti Bachao Beti Padhao den lirumedema "Run for Unity" omen nung ajemdaker Town Centre, Mokokchung nung October 31, 2023 nü Rashtriya Ekta Diwas 2023 (National

Unity Day 2023) sentong ka agia liasü, kong kaketshirte, arogo balala aser jila nung aliba nüburtemi shilem agia liasü.

Rashtriya Ekta Diwas pledge agiba sülen shilem agirtem Imkongmeren Sports Complex

leni asemtepa ao aser yangji sentong ka agia liasü.

Iba sentong nung menden ya EAC (Hq), Vitolu liasü aser ADC Mokokchung, Chumlamo Humtsoe-i anir pledge agiba sülen "Run for Unity" tenzüka liasü.

Navi Mumbai semdangtsü aliba anogo melenshir

Dimapur, Mongputeni/Oct. 31 (TYO): Navi Mumbai nung aliba Nagaland House semdangtsü aliba anogo melenshir, ta MLA aser Committee on Government Assurances for 2023-24 chairman, Kuzholuzo Nienu-i sangdong ka ajanga metetdaksü.

Iba tesem ya November 5 nungi

November 8, 2023 tsüngta semdangtsü ta sangdong ajanga ashi. Committee on Government Assurances nung züngsem ajungai pei mapang yanglushia Navi Mumbai nung aliba Nagaland House semdangba nung shilem agitsü ayongzüker, ta sangdong ajangasa ashi.

Phek Town nung State Handloom Expo ayongzüksü

Dimapur, Mongputeni/Oct. 31 (TYO): Nagaland Handloom & Handicrafts Development Corporation Ltd. (A Govt. of Nagaland Undertaking) Dimapur ajanga Phek Town nung December 5 - 18, 2023 anogotem State Handloom Expo ka ayongzüksü, ta sangdong ka ajanga ashi.

Iba Expo nung shilem agitsü asoshi December 1, 2023 tashinung application agütsütsüla.

Iba sentong ya Office of the Development Commissioner (Handloom), Ministry of Textiles, Govt. of India, New Delhi ajanga sponsor asür.

Jangra aliba co-operative society, producer company, SHGs, Federations, Apex Societies, silk weavers densema Handloom & Handicrafts agencies, Jute Artisans aser KVIC temi iba sentong nung shilem agitsü asoshi address tejangja, mobile number, bank account number den IFSC code dena application zülur Project Cell, NHHDC Ltd, Half Nagarjan, Dimapur tongtsütsüla, ta sangdong ajanga ashi.

Stall ajunga angati agütsütsü aser NHDP guidelines nung aliba ama lumpsum TA/DA aser Freight charges agütsütsü.

DDMA ajanga Mokokchung nung mock drill agitsü

Dimapur, Mongputeni/Oct. 31 (TYO): District Disaster Management Authority ajanga Mokokchung nung November 2, 2023 nü mock drill agitsü renemshiba mapang lir, ta Deputy Commissioner aser Chairman, DDMA, Thsuvisie Poji ajanga sangdong ka nung ashi.

Ajungben alimar lendong balala ajuruba mapang telangzüba agütsütsü renemshia aliba asadanga nung shilem ka ama iba exercise ya agir alitsü. Iba mock drill ya anepdang 9:00 ako nungi tenzüksü aser Mokokchung Town kübok tesem pongu nung agitsü.

Iba dak sendakba nung Mokokchung Town nung aliba nüburtem dang mock drill mapang maoksatsü ayongzüka liasü. Kasa mapang iba exercise tajungtiba nung agitettsü mechi nüburtemi amalitep akatsü aser shilem agirtem den yariteptsü ashi.

Iba mock drill ya Imkongmeren Sports Complex (Local ground) Mokokchung, Dilong Government High School, Model Higher Secondary School Arkong Ward, Mokokchung Municipal Complex, Jubilee College Salangtem aser VidiVici Villa Private Building Aongza Ward nung agitsü, ta sangdong ajangasa ashi.



Sardar Vallabhai Patel asoba anogo, October 31 bilemteta Rashtriya Ekta Diwas sentong District Administration Dimapur aser District Sports officer ajanga "Run for Unity" sentong ayongzüka liasü. Iba sentong ya Government Higher Secondary School, Nagarjan nung agia liasü.

Mokokchung DC ajanga metetdaksür

Mokokchung, 31st Oct: Ungma o Longsa yim na tsüngta NH - 202 Mokokchung - Tuensang lenmang kilometer 12 nung aliba Tzüla apu (bailey bridge) kanga mejungi raksaa lir, anungji, gari kecha iba apu/lenmang ajanga mesenzütsü/magitsü asoshi Mokokchung DC Thsuvisie Poji-i ozüng küma sangdongogo.

Concerned department-i yanglushiba maparen yakta tenzüksü asameyangdar, anungji, iba maparen metembang tashi iba lenmang/apu ajanga gari kecha mesenzüdaksü. Ajaki iba nungji tashi angatsü metetdaksür, tashi mangartem ozüngi melaba ama merenshitsü, ta Mokokchung

DC-isa metetdaksü. Apu meyanglushi tashi senzüsenbongertemi talisa kidanger district; Tuensang, Shamator aser Noklak leni jajartemi item lenmang agitsü metetdaksür:

1. New Sangsomong - Yehemi - Atoizu - Doyang.
2. Mokokchung - Chuchuyimlang - Longmisa - Alisopur - Trongar - NH 202.
3. Mokokchung - Dikhu - Chare (Shortcut).

Iba dak sentakba nung EAC Ongpangkong ajanga concerned department den tongtepratepa iba ozüng mapa akümtsü asoshi Mokokchung DC-isa metetdaksü.



Major Dhyan Chand National Stadium, New Delhi nung 'Rashtriya Ekta Diwas' anogomong nung 'Run For Unity' sentong tenzüksüba mapang Union Home Minister Amit Shah den Union Sports Minister Anurag Thakur aser MoS Meenakshi Lekhi nungertem sensaksemba noksa nung angur.

MP polls: Congress-i recruitment tatidang taa magitsü nangzük

Bhopal, Mongputeni/October 31 (Agencies): Congress lenir aser taoba Union minister Pradeep Jain Aditya-i Mongolbarnü ashiba agi, Madhya Pradesh nung par party-i sorkar kümtetra parnoki sorkar mapa atema tatidang agiba mapang taa kecha magitsü. State nung election November 17 nü agitsü. Osang benertem den sensaksemba mapang Jain-i, Madhya Pradesh nung lanur crore 1 shi mapa mangu lir aser parnok rongnungi lakh 40 dang sorkar den züngoksema lir, ta ashi. State nung BJP sorkari taoba

küm 10 tsünga recruitment tatidang balala atema sensaker mapa bushirtem dang nungi taa sen crore 100 dak tema bendenogo, ta paisa shisem. Jain-i ashiba agi, taoba küm 18 tsünga mapa mangu aliba lanur 17,298 soseta süogo. State nung sorkar kümtetra Congress-i sorkar mapa atema recruitment tatidang agiba mapang taa kecha magitsü telemtetba agiogo, ta Jain-i ashi. Paisa, sorkar mapa asoshi tatidang agiba result koba asa sota yua lir, iba ya-a sangdongtsü, ta ashi. Tatidang result sota aliba bushisüngdangtsü atema

commission ka tentetsütsü, ta pai ashi. Congress-i sorkar mapa atema online tatidang melena offline tatidang ayongzuka agitsü, ta Jain-i ashi. Pai ashiba agi, tatidang nung ochi mashi inyakyim aliba, result sota ayuba aser tatidang paper leak asüba amala ya MP nung nung mapa manguba kulitem lir. Vyapam scam, 'patwari' (revenue department staffers) recruitment tatidang ochi mashi ken o, constables shimba nung inyakyim meshidakba amala ajanga state noksa raksatsüogo, ta Congress lenir-i ashi.

Chandrababu Naidu nem hopta 4 atema interim bail agütsü

Hyderabad, Mongputeni/October 31 (Agencies): Sen crore 371 Andhra Pradesh Skill Development Corporation ochi mashi ken o nung aija Telugu Desam Party lenir Chandrababu Naidu tepuokdaki yokba sülen anogo 53 lir pa Mongolbar nikongtsütsü Rajamahendravaram Central Jail nungi adokogo. High Court-i arishi küm 73 tain taoba Chief Minister nem ya hopta pezü atema interim bail agütsüogo, kechiyong pa tenük tachichilen cataract surgery agitsü nüngdaka kümogo. Naidu shiba dang bail bond sen lak ka agütsütsü shiogo, pa November 28 nü nikongtsütsü 5 ako matongdang jail superintendent matsüngdang bendanga agütsütsü nüngdaker.

Pa pai mulungba mozüki ka nung temang anepalutsü atema temelaba agütsüogo, ajisüaka medical report benoktsü nüngdaker. Pa tepuokdak nungi chioker aliba mapang pa anema ken o benoker aliba dak sendakba nung shinga nema tenangzükba magütsütsü mesüra amokmeren masütsü asoshi tetuyuba agütsüogo. Naidu tepuokdak nungi adokba sülen Rajahmundry aser Andhra Pradesh kübok tesem balala nung nüburtem aika benjungtepa liasü. Par jabaso Nara Lokesh, shibai taoba ita NDTV den jembiba mapang tebu chiokdaksütsü atema "civil war" ka asoshi jembia liasü, pai X sabang ajanga TDP tekolakba chiokba ya takok ka lir ta ashi.

Rajahmundry nungi Guntur kübok Tadepalli tashi aoba mapang pa pusemertem den jembia dang Naidu-i parnok danga kanga pelaba lemsatet aser ashiba agi, "ni timtem nung aliba mapang nenok ni asoshi lendi-i adok aser kü atema sarasademtsüogo. Nenoki kü dang temeim sayuba ni kodanga mamatoktsü.. Andhra Pradesh nung dang masü saka Telangana aser alima ajunga nung." Pa Hyderabad-i mao tsünga Bodhbarnü Tirupati semdangtsü akok. Kasa mapang nung ruling YSR Congress Party otongdar Sajjala Ramakrishna Reddy-i, Naidu tepuokdak nungiu chiokba atema TDP pur pelatepba ya taksüka lir, ta ashi.

Maharashtra nung Minister tem ki kima nung security akangshir

Mumbai, Mongputeni/October 31 (Agencies): Pro-Maratha quota longkak aitertemi Maharashtra kübok Marathwada tesem nung yimden yimsüsürtem ki aser office tem amakba sülen police-i, Mantralaya nung chief minister, minister tem aser tanga yimden yimsüsürtem ki kima aser state kübok political party tem office nung security akangshiogo, ta ketdangsür kati ashi. Hombarnü longkak aitertemi MLA asem- NCP nungi ana aser BJP nungi ka- ki mesüra office rongtoktsü aser raksaja liasü aser municipal council building ka maka liasü. Mepetmesü ya timba Beed district nung ataloka liasü. Ano nisung telok kati Jalna nung Ghansawangi kübok panchayat samiti office ka Hombar aonung rongtoktsü. Maneni Maratha quota meshia longkak aitertemi

parnok takhangba nenshitsu atema Mogolbarnü Puni yimti nung Mumbai-Bengaluru Highway nokdanga liasü. Ketdangsürtemi Hombarnü nikongtsütsü Beed district aser Dharashiv district nung curfew benoka liasü. Maneni south Mumbai nung tongtibang tesemtemi sepaitem yokogo, ta ketdangsür kati ashiba den department kanga kümküma lir ta ashi. Louis Wadi, Thane nung Chief Minister Eknath Shinde'er kimai security aika yoka lir, ta police ketdangsürtemi metetdaksü. Mumbai nung chief minister, deputy chief ministers Devendra Fadnavis aser Ajit Pawar, minister Chandrakant Patil, Deepak Kesarkar, Dada Bhuse aser Ambadas Danve o Ashok Chavan na densema tanga lenirtem official residences kima security akangshiogo, ta police-isa metetdaksü.

Phone tap asüba kecha tsübua mali: Rahul Gandhi



New Delhi, Mongputeni/October 31 (Agencies): Apple-i Opposition lenir aika dang state-i teyari agütsürtemi parnok indang iPhone tem hack asütsü meranger ta tekümdangtsü metetdaksüba dak sendakba nung Congress lenir Rahul Gandhi-i, Bharatiya Janata Party (BJP) sorkar aija, parnok indang phone tap asüba atema parnok kecha tsübua mali ta ashi. "State-i teyari agütsürtemi nenok amaktsü meranger ta Apple-i osang agütsüba opposition lenirtem ajaki nguogo. Onok indang office nung alir ajaki iba osang agizükogo. KC Venugopal, Pawan Khera, Sitaram Yechury, Priyanka Chaturvedi TS Singh Deo, Mahua Moitra, Raghav Chaddha nungeria iba osang agizükogo.. Nenoki phone kwi tap süner süang.. Ni kecha hau ta mali. Nenoki dang aginüra ni kü indang phone nenok nem agütsütsü. Onok tsübua mali. Onok radar," ta Gandhi-i Delhi nung osangbenertem den sensaksemba mapang ashi. Gandhi-isa, Modi-i aniba sorkar tanüla ya Adani Group kabuma nung lir ta ashi. Paisa, Adani ya Ato Kilonser Modi aser Union home minister Amit Shah tema nung lir ta ashiba den taoba mapang PM Modi ya Adani atema inyaker ta ashiba lepshi jembia. "BJP sorkar aser BJP indang financial system ya Adani den indang indanga sendaktepa lir," ta pai shisem.

Pai chuba ka indang tashi, shibanga aliba oro ka ket nung aliba indang otsü ashi aser ashiba agi, "mapang talangka opposition party temi chuba maka aruogo. Ajisüaka tashibo Adani ket nung lir. Onoki Adani (intelligence agencies) dak kodang kongshidir idangji CBI pur yima arur." "Tatishitsü aika lir. Mumbai airport ya tangar ka meyong liasü. State-sponsored agencies temi kibur amak. Pai Adani nem airport bendanga agütsü. Coal over-invoicing dak sendakba nung CBI, ED bushisüngdang kecha maliasü. India nung rongsen auyar. India nung lanurtem lemdangogo aser kanga mepelateper aser kasa mapang nung Adani-i rongsen ajak bener aoer," ta Gandhi-i ashi. "Item nisungtem yagi parnoki technology azüoker anungji India nung lanurtem azüoker ta bilemer. Saka hadir tejen (political communication) tedangshiba lir ta bilemetang," ta pai Bharat Jodo Yatra adeshia jembia. Gandhi-isa, pa Adani Group den kecha tsükchitep mali saka Adani Group amala monopolies tem tentetba anemer ta ashi. "Adani sorkar melenshitsu atema ni tasa kar meteta lir. Ni India indang idea kümzüktsü meranger. Iba ya election akoktsüba atema dang masü. Nenoki result angutsü ta ni temlung lema bilemer," ta Gandhi-i ashi.



Oct. 31, 2023 : Patna yimti nung Mid-Day Meal workertem parnok itasen tudaksütsü asen regularization atema takangba agüja longkak aitba noksa.



TIR YIMYIM YIMOBILEM (EDITORIAL)

DIMAPUR RASEMNÜ, YIMPOKSÜI (YIMPOKSÜI) 01, 2023

Kibakiyimba mapang

Akhi tsürabur mapangbo kibakiyimba mapang ya alu nung metsü yoker külen April aser May ita nungsa agia liasü, kechiyong kibong tasen akümertema tamasa alu chia yur külenang kibong aküm, anungji alu nung tsük metsü yoker külen kibong akümbaji sobaliba tajung ka liasü. Ibaji dang masü saka kibong akümstsü mapang lateta yurbo kiyimsangba mapaji kiyimki asütsüba liasü. Tsümarbo kibong nung tanur tebur kwi kibong kümdir ki balakati razüka meyoki külemi alir saka asenokbo kibong kümer tsüraburtem den semloka alitsüba liasü, anungji kibong aküm aonungsa kinungtsü anioka kibong tasen tenzüksü asoshi tamasa kiyim ki yanglua ayu. Aji oda, kibong akümstsüba kümba kiyimsang asoshi teinyaktsü tongtibang anaji, ka kiyimki asütsü aser ano kaji kiyim lu achitsüba liasü. Iba sobaliba aser khuret jagi asangurtem ajak mapa kanga meranga inyaktsü nungdaka aküm. Atangji, kibong akümstsü asoshi ki tasen ka sür külenang ano alu balaka ayimtsüba mapa temela masü, itemji tsürabur aser kinungertemi yariyonga peisasa pei kibur küma inyaktsüba mapa aika lir, kechiyong kibong kümer kinungtsü den alidangbo pai anir tenatiang inyaktsü. Ano, akhi mapang kibong akümba maparen nung tajung kaji, asenok Khristan kümer külen arogo nung kiyimba kulizung agia kibong akümdanga kibong tasen akümba sentong nung adenba agi pei lui moutettsüsa sentong meyanglu, kechiyong kiyimba sentongji sentep aonung dang agia liasü, anungji kibong tasen akümba anogo nunga alui orr adoker külenang kiyimba sentong aser kiyir benjong nung dena pelatep. Aji oda, kibong tasen akümba agi tangar nem timtem khuret balaka magütsü pei yari, pei akok kiyir benjong küpteta liasü. Iba denji tanü asenok kibakiyimba yimya aser sobaliba medemdangra kenyongi amzüdoka ittepa lir. Akhi kibong tasen akümba yimyaji bilemdangra, kibong akümba anogo agitsüba sübosülemtsü, benjong naro aser chiyongdaksütsü indang masü saka kibong kümer lia aotsüba indangang tuluba aser süoki taiba bilema tsüraburtemia renemtsü aser kiyimtsü purtemia inyak. Aji oda, akhi mapang kibong tasen akümdangbo tangar nungia kecha meimla aser maka ser nung takar amaia mesayu. Ajisüaka, tanübo kibong tasen akümstsü purtemi dang masü saka tsüraburtemi dena kibong tasen timmedemi lia aotsü bilemer masü saka kiyimba sentongang tuluka aser tajung südaktsütsü meranger. Aji oda, kibong kümer ki talidak maka aser mapa teinyaktsüa maka saka kiyir benjongbo tangar dang apua tuluka ayongzük, anungji kibong tasen akümba kulizung agir tenla kidang nungi ayazükdangyongi sentsü nung ayazüker. Iba tiaji asenok ajaki kanga süoki ia shisadangtsüla aser kibong tasen sentsü nung metenzüksüsa temelenshi ka bener arutsüla. Atangji, kibakiyim dang sentsü metsüdaktsünüba agi tesem kar nungbo arogo aser yimteni benjong tulu mayongzüki tongmelang südaktsütsü meranger saka makoker, kechiyong lanur ka asoshi taküm nung kibong akümba anogojisa tongtibangtiba, anungji iba anogo nungji kinunger aser medemer ajak talang nungi dena jaoka pelatepner aser pelateptsüla. Aji oda, arogo aser yimteni masü saka tsüraburtemi pei kibong khuret lanurtem nem angatetdaksüra, iba jagi kibong tasen akümba agi sentsübo metsüloksü. Kibong akümba anogojibo kenü dang aser iba anogo indangjibo nisungtemi ita ka dang jembitsü saka kibong akümbaji kenü atema mesüra ita ka atema ta masü saka masü tashi apuanisa alitsü akümer, anungji kiyimba anogo sentongji komaka renemtsü ta asüba dang nungjibo kibong kümer lia aotsü asoshi komaka renemtsü ta asüabajisa tongtibangtiba lir. Asenok aikati kiyimba benjongi arurtemi bendentsüba agi sentsübo menoktetsü nung ta bilema kibakiyimba sentong ya business inyaker amai kümdaktsür. Ibaji peisasa pei külakoktsüba mapa ka asütsü. Iba amaji mebilemi asena asen yari ka nung renemtsüla aser kibakiyimba anogoji masü saka kibong tasen lia aotsüba anogotem asoshiang taküm nungdak dang masü saka sobaliba nung aser Tsüngrem meteta alitsü asoshi bilema renemtsüba jiang tagitsü aser temoatsü asütsü.

OLEMSABANG

Naga limaji Khristan lima ta alima dang mapa agi sayutsüla

~ L. Kika Pongener.

Naga lima ya Khristan noklang shilem nung 90 % aliba lima ka ta ashitsü akok. Naga limaji Khrista asoshi ta alima matsüngdang yimjak nung yimyim ayimoktsüba lima ka lir. Missionary merijang ter yoktsü Tsüngrem tsüngdang azüngashia nangzükba lima ka lir. Naga limaji yi kheni mayoktsü aser majemtsü (Dry State) ta alima dang yimjak nung yimyim ayimoktsüba lima ka lir. Naga limaji Assembly menden - 60 prongla nung Khristan temeja mener yimsu asüba linuk ka lir. Shidakba jembidi sura, Naga lima yabo kodak lima amai alitsüla. Anungji alima tesem balala nungi bendanger mongdang/benjong-bentsü nung adentsü arurtem, mesura alima reprangi arurtem matsüngdang, Naga limaji Khristan lima ta alima nubur matsüngdang mapa agi küli sayutsüla. Alima tesem balala dangi missionary noklang/merijangsa aika meyokaka, bendanger asen lima reprangi arurtem (Foreign Tourists) dang Naga limaji Khristan lima ka ta mapa agi küli sayutsüla. Aji oda, Naga lima nung sorkar sentong nungi shir loktiliba balala nung kechi sentong atongdir atong-aka, ajungaji Khristan jakla yimya (Christian Spirit) nung dang sentong atongtsüla aser inyaktsüla. Akokba tashi sorkar nungi shir loktiliba balala nung kechi sentong agidir agi-aka, Deobar temeshi amongnubosa paitoker dang sentong ajak yanglutsüla. NPSC & NSSB-i ketdangsua agiba tatidang (Examination) asüyongjia, akokba tashi Deobar anogo nungbosa magitsüla. Tanü India lima nung UPSC, SSC, Banking Service Exam. etc. ajak Deobar anogo nung dang agir, aser Christmas anogo nung 'Good Governance Day' amongtsü Bill passed asütsü jembiba-a angazükogo. Aji oda, India limaji Hindu/Muslim/Budhist/etc. teimba aliba lima asünung yamaji inyaker. Ano kanga taoksatsüka aser tesasatsüka, Prime minister-bai tawa 1st October deobar anogo nungang, lokti nubuyoktsü ayongzükba aser Tapi Assembly Constituency Mon, Bye-Election nung deobar anogo nung vote azüngtsü lemtetba, item ajak ya Khristan-tem anema inyakba lir. Anungji Khristan State ka ama yimsusur tatartemi item anogo-jibosa melenshidaktsütsüla.

Anungji asen Naga lima yabo Khristan lima ka asünungji, Khristan lima ka ama, sorkar sentong ajunga deobar anogojibo paitoker dang yanglutsüla. Aji oda, yimsusur ajunga Khristan tamanger tesa agi yimsu asüba lima ka nungbo, deobar temeshi amongnuji, kanga dang metsüngareta, anembonga, asüngteta, meshiteta amongtsüla. Deobar anogojibo Temeshi amongnu ama, yumsusuri anir nubur ajaki meshiteta amongtsüla. Küm kar nungbo 'Hornbill' benjong anogo December 1-10 tetsüngda nungji deobar anogo ajurushia atar, anungji deobar anogo nungbo, tanga sentong kecha meyanglutsüla aser sentong kecha magi-i anena atatsüla. Ibajagi dang bendangertem/limapur matsüngdang Naga limaji Khristan lima... ta mapa agi küli asütsü. Anungji deobar anogo nungbo alima tesem balala nungi benjong nung adentsü arur 'Tourists'-tema Khristan tamangertembo, asen lima nung tekülem sentep nung adentsü maongka agütsütsüla.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Nasarawa state, Nigeria nung Khristan doctor ka tepset

Abuja, Mongputeni/Oct. 31 (Agencies): Nasarawa state, Nigeria nung Khristan doctor ka October 17 nü motorcycle nun glia lepset ta osang ajanga ashir.

Lafia jila nung aliba Angbas Hospital nung tekolakba Dr. Stephen Angbas ya state south tsütsü Awe County nung par alu nungi kidangi meyipa shilangba mapang nikongdang 4:00 ako meta kiralongrar temi iba lendong ya agütsü, ta yangji alir Jackson Habila-i ashi.

Angbas ya Evangelical Reformed Church of Christ nung züngsem liasü, ta Habila-i ashi.

Jangargari-Awe road nung iba lendong atalokdang Angbas indang commercial motorcycle driver Mikailu Dahiru yiru, ta Nasarawa State Police Command nungi police odongtar Rahman Nansel-i sangdong ka nung ashi.

Parnok dak nok agi alep aser Dahiru ya anasa aliba mozüki kayi anir ao ta tenük kuli alirtemi ashi.

Iba lendong ya tamangba

yimsü nung ajemdaker agütsü asü masüa mejangja, saka iba lendong ya Nigerian kiralongrar temi Khristanpur amakba den sako lir.

Nasarawa state nung Fulani shiruru metsürtem aser danga kiralongrar temi lendong tali agütsür, shirnok iba state nung aita lir. April 24 nungi April 29 tsüngta Fulani shiruru metsürtemi Ajimaka, Doma County aser danga yimtsüng 13 amakdang aluyimer Khristanpur 12 tepseta liasü.

March ita tiyongtsü tashinung Fulani shiruru metsürtemi Khristanpur timba aliba Nasarawa state nung amakdang nisung 200 dak tema süogo aser ki o jen aser alu raksatsü, ta Nasarawa nung aliba Ajiri Afo Development Association ajanga ashir.


2022 küm tamangba yimsü mechi alima nung Khristanpur timba tepsetba linükji Nigeria ya lir, kong nisung 5,014 tepseta liasü, ta Open Doors indang 2023 World Watch List osang ajanga ashi.

Ano Khristanpur pua bener aoba (4,726), tashiyim amshiba mesüra merenshiba, tashiyim agi kibong akumba mesüra shi aser tekolok timtendaktsüba nunga Nigeria ya temaba jenjang nung lir, aser tamangba yimsü mechi ki aser shishilempadak tesemtem raksatsüba nungi tema nung lir. Tekülem ki raksatsüba aser linük telung nung timtem balala mechi tesem balala nung prokshiba tsütsüa Nigeria ya tanabuba jenjang nung lir.

2023 World Watch List ajanga alima nung Khristanpur alitsü tamajungtiba linüktem asadanga rongnung Nigeria ya jenjang trok buba nung lir, koba taoba küm jenjang tenet buba nung liasü.

"Fulani, Boko Haram, Islamic State West Africa Province (ISWAP) aser danga telungpur temi Khristanpur aliba tesem meita aor, tepseter, tashiyim amshia shi nung medemer, sen meshitsü mesüra alar ama ayutsü asoshi pua bener aor," ta World Watch List ajanga ashir.

Khristanpur sarasademdak bomb pokloktsüba süngmanger: Jharkhand Governor



Pramakudi, Mongputeni/Oct. 31 (Agencies): Deobarnü Ernakulam, Kerala nung bomb pokdaktsüba indang jembidang, Khristan kati Khristanpur sarasademdak bomb pokloktsüba ya mamanger aser süngmanger, ta Jharkhand Governor CP Radhakrishnan-i Hombarnü ashi.

Kerala bomb lendong asoshi Dominic Martin ta sür tebur kati tenüng agi aser Thrissur district nung police matsüngdang bendanga agüja liasü.

CP Radhakrishnan-i Kerala sorkar dang aibelener shidakba bushitetsü mesüra tarutsü nung lendong

majurutsü asoshi National Investigation Agency (NIA) nem ken o agütsütsü ajungshia liasü.

"Khristan kati par Khristanpur sarasademdak bomb yutsütsü ya shingaia mamangtsü. Kerala sorkari tekeraba nung mera agitsüla aser shidakba aibelener bushitsüla mesüra tarutsü nung lendong majurutsü atema NIA ajanga jungjunga bushisüngdangtsüla," ta pai ashi.

Extremists tem yariba atema taoba mapang BJP MP inyaksang Radhakrishnan-i Kerala aser Tamil Nadu sorkar aitsü.

"Yangji Communist sorkara

süang mesüra yangi Stalin-i aniba DMK sorkara süang, item sorkar yagi nisung tepsetertem aser bomb yutsürtem kumzuka ayur," ta pai osangbener dang ashi.

State anaprong sorkar ya Islamic kiralongrar temi timtem agütsür, ajisüaka Muslim nungertem bhukuma parnoki extremists bhukumer ta pai ashi.

Deobarnü Kalamassery nung convention centre ka nung bomb asem pokdakja liasü, kong Jehovah's Witness nungi tamanger noklang asemnü sarasademba tembanga adenshia liasü. Iba lendong nung nisung asem asü aser 50 dak tema yirua liasü.

ANO GO ABEN TSÜNGREM DEN

Kanga asangtsüla

T.ken 145: 1-13

Asenoki metetta aser memetetti Tsüngremi asenok lenmang aisü nung kümzük. Asenoki Pa tekümzük mapa asoshi Pa kanga asangtsüla.

Pa uluba asoshi asenoki Kibuba tenüng sangdi. Ken züluri ashir Pa uluba tatem maka. "Ni na uludaktsütsü, kü Tsüngrem, o chuba. Aser ni ne tenüng teti moatsütsü. Anogo shia na moatsütsü, aser ni ne tenüng teti asangtsü" (t.1,2). Tsüngrem uluba sanga asenoki teti tatem maka takümü indoktsü. Ano Pa ulubaji mebushimatsü. Asenoki ibaji asadangtsü makok. Asenoki pa lenden metong, talang aser tesadem aser tarok metettsü makok. Aser Tsüngrem ulubaji tebilemtetba lir. "Ne mapatem putu kati putu ka dang asangtsü, aser ne tesüngmangtsü mapatem indang ni shisadangtsü" (t.4,5). Asenoki taruba putu dang Tsüngrem uluba indang ashitsüla.

Idangji ken züluri Tsüngrem ajungba indang tenüng asang. Tekong 7 nung ashir, "Parnoki na kanga ajungba nüngsang jembiteptsü, aser ne Temeshiba indang pelashishia metetdaksütsü (t.7)... Kibubai ajak dang ajunger aser pa temeim yimlibilem, pa mapa ajak madak lir" (t.7,9). Tekong 8 nung Kibuba taochi rasar. "Kibuba taochi aser yimlibilem lir; ain adoktsü mekara, aser yimlibilem tulu lir". Pa ain doktsü mekeraba nung nai pelar asü? "Parnoki ne yimli sentsüwangshi indang jembitsü" (t.11).

Asenoki Tsüngrem naroküm angajemtsü makok. Saka Pa shiba aser Pai asenok taküm nung kechi mapa inyak iba asoshi pa tenüng asangtsüla. Ni kümzükba asoshi Tsüngrem tenüng asanger. Pa uluba, Pa ajungba, Pa taochi aser Pa sentsüwangshi asoshi Pa tenüng sangang.

Temesepba mozü nungi kumzükba atema Matthew Perry-i Tsüngrem tenüng asang

Mongputeni/Oct. 31

(Agencies): Matthew Perry ya asütsü küm k alia pa temesepba mozü aser yi nungi kumzüktsü asoshi Tsüngrem den tesendaktep tasen yanglua liasü aser pa tejashi shidoktsü ta pai tawa zülua liasü.

Friends nung Chandler Bing shilem agisang Perry yagi arishi küm 14 nungi yi ajemba indang jembia liasü aser AA senden noklang aika nung denogo, detox 65 ben agiogo aser rehab nunga 15 ben menogo ta shia liasü. Rehab sentong nung pai sen million \$9 indok ta pai ashi.

Pa arishi küm 54 lia October 28 nü asü.

2018 küm gastrointestinal perforation ajanga pa tera agi coma nungi kumzuka liasü.

Tesüba küm ishika tsüngta pa temesepba mozü aser yi addiction koktet aser iba atema Tsüngrem tashi dang pelar, ta pai pa indang kaket Friends, Lovers, and the Big Terrible Thing nung zülua liasü.

"Tsüngrem, imlibilema nu yariang," ta ni tanemi ola adok. "Na yangi lir ta sayuang. Tsüngrem, imlibilema ni yariang."

"Ni apudak dang tesangya tuluba akum aser takdang ajunga yamoka liasü... Ya kechi asür? Aser ni kechiba tajungba akumer?" ta pai zülua liasü.

"Ni nüktzü alua ajep tenzü - temang anokshia mazüokteti ajep. Ni jashiba agi ajepba masü. Kü takum nung mezüjung junga bilemba ajanga ni ajep. Ni anepalua tajungba akum ama bilem. Küm aika Tsüngrem den tesendaktep maka, takum aser tejashi den ni atsütepa aru aser ajakji shidoktsü," ta pai zülua liasü.

Tsüngrem dang pa nüngtugu kumdaktsütsü asoshi sarasademba ya dangar lanurtem dang nungi balaka liasü ta pai zülü.

"Kü den Tsüngrem liasü. Aji tejangka liasü. Tanga ni yamaji sarasademogo," ta pai iba kaket nung zülua liasü.

AO OSHI ANGAZÜKDAK:
TANÜ ANGAZÜKTSÜBA OJANG



Satakjema

(adv) ajaki angutsüsa (wide open)

* Tenem kolak nungi yimer lu ajak satakjema angur.

Satoksatoka

(adv) tetsübu tarendak mali (feel free)

* Ozü kidang medemer ajak satoksatoka kazür.

OLONG PAITEP # 6682

1			2			3			4
			5		6		7		
8									
			9						
	10								
								11	12
			13				14		
15						16			

TIPIEN

- 1. Anenzükdak ki - (5)
- 3. Asür mangyimba - (5)
- 5. Temulung nung shisadang - (5)
- 8. T ___ lu - (3)
- 10. Takdang temalen - (9)
- 11. Tesa ___ a - (3)
- 13. Ajungbena temulungjang tongtonglatsü atu - (5)
- 15. Tejen lai nung tesayur - (5)
- 16. Tsüngsak-mopung - (5)

LANGTSÜNGLEN

- 1. Reprangdaksü - (4)
- 2. ___ ur - (3)
- 4. Kiojen yangludak - (6)
- 6. ___ ait - (7)
- 7. Nagaland nung ayong ka - (5)
- 9. Küm kasa purtem - (5)
- 10. Tetsüng tajemetdak - (6)
- 12. ___ adenshi - (4)
- 14. Tsünüsenbongtsü adokdak - (3)

OLONG PAITEP # 6681 TELANGZÜBA

TIPIEN :

- 1. Kasa, 6. Rangben,
- 7. Mait, 9. Poktet, 11. Ati,
- 13. Atasa, 16. Rür, 17. Rajang,
- 20. Lanu, 24. Nüngjem,
- 25. Süra.

LANGTSÜNGLEN :

- 1. Khu, 2. Sùjak, 3. Onük,
- 4. Oba, 5. Anü, 6. Ratet,
- 7. Mozü, 8. Ita, 10. Tar, 12. Tinu,
- 14. Salem, 15. Aja, 18. Anünü,
- 19. Taju, 21. Ano, 22. Onü,
- 23. Kua.

NAI-A YA METETTER MA



Nüngtugu kentener Taylor Swift-i otsü taseñ yanglupet yanglua arudar. Honibarnü Spotify ajanga 1989 (Taylor's Version) lemsatep aser iba ajanga taküm küm anogo ka nung teimtiba angaba kensep (single-day streamed album) otsü yangluogo.

Tanur asoba anogo nung salem osang den noksa angati adokdaksünüra - Tenüñg, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimim@gmail.com nung yokang mesüra Tir Yimyim bureau tem nung agüjang.

NCM-i Taj Palace, New Delhi nung shilem agi



Dimapur, October 31, 2023

(TYO): October 2, 2023 nü Central Park, New Delhi nung Rashtriya Sanskriti Mahotosav benjungmong nung shilem tajung agiba sülen Nagaland Conservatory of Music-i ano Taj Palace, New Delhi nung shilem tajung agiogo.

Directorate of Revenue Intelligence, Ministry of Finance ajanga ayongzükba 'Global Conference on Cooperation in Enforcement Matters' kenten sentong nung shilem agitsü

atema NCM jaoka liasü.

Iba kenten sentong nung enforcement departments balala nungi tekolakpurtem den linük 70 tema nungi ketdangsurtem aden.

Nagaland Conservatory of Music ya 2012 küm Dimapur nung amenok. Kaketshirtem musicians, scholars, teachers ama sayutettsü aser lokti nem performance, scholarship, aser education agütsüsü nükjidong nung NCM tenzüka liasü.

Tesüiba küm 10 tashi

arudang NCM ajanga alima jenjang nung specialized music education aser professional training agüja arur.

India nungi dang masü saka Germany, Philippines, Korea aser France nungi musicians aser artistes aika professional career tejakleni aotsü atema NCM nung arua tesayubatem angazükogo.

NCM-isa India tenüñg nung Norway, Belgium, Italy, Spain aser Ireland nung shilem balala agiogo.

Manipur moreh nung SDPO ka tepset; Sorkari Rs 50 lakh agütsür

Imphal, October 31, 2023

(Agencies): Moreh nung Sub-Divisional Police Officer (SDPO) Chingtham Anand Kumar tepsetba atema October 31 nü Manipur state Cabinet rongdak senden ka ayonga menogo.

Cabinet-i telok anati aremzüka aruba ajanga tesüiba ita ka ser tesadang tashi yimjung nung dang aruba atema pelaba metetdaksü.

Chingtham Anand Kumar ya from Haobam Marak Chingtham Leikai, Imphal nungi liasü aser Eastern Shine School nung helipad yangluba repranga senzüdang pa khaset.

Kuki telungpurtemi pa khasetba khukhua aitsür ta Manipur Cabinet-i ashi.

Chingtham-i mapa tajung inyakba atema tetushi agüja Cabinet-i par kibong nem Rs 50 lakh teyari agütsüsü mulunga agizükogo.

State sorkarisa par kinunger ka nem mapa agütsüsü

nangzükogo.

Iba mapa inyakertem pua merenshitsu atema Cabinet-i Moreh aser temeket nung joint operation inyaksü tetuyuba agütsüogo. Iba mapa atema Imphal nungi state police talila Moreh-i yokogo.

Cabinet-isa Central aser State forces dang NH-102 nung Pallel-Moreh lenmang nung gari aser nisungtem tetsükdaksü kecha melii senzusenbongtsü atema mapa inyaksü tetuyuba agütsü.

India'er Act East Policy nung Moreh ya kanga dang tongtipang tesem ka lir anungji Moreh jila aser temeket nung nisung kari dang ozüñg alema prangpong bener senzüba putetra merenshitsu ta state Cabinet-isa telemtetba agiogo.

SDPO Chingtham Anand Kumar tepsetba atema Cabinet-i Unlawful Activities (Prevention) Act, 1967 kübok World Kuki-Zo Intellectual

Council (WKZIC) ya unlawful association/organization ta sangdongogo.

Tanü Manipur sorkari SDPO Chingtham nem tetushi agütsüba sentong ka agitsü ayongzük saka joint action committee (JAC)-i pa indang tasü mang magizüksü ta ashiba ajanga iba sentong athitsüsa aküm.

Ist Battalion Manipur Rifles Ground nung aliba Manipur Police Memorial nung asür Chingtham Anand nem tetushi agütsüba sentong ka agitsü sorkari ayongzüka liasü.

Asür Chingtham indang mang Moreh nungi tayimtsü ajanga bener arur Jawaharlal Nehru Institute of Medical Sciences nung yua lir.

Chingtham tepsetba anema tentetba joint action committee-i tai tongloktsürtem mesüra pa tepsetertem pua maru tashi pa mang magizüksü ta bangjemtepogo.

Dy. CM Tynsong-i Meghalaya NPP president inyaker

Shillong, October 31, 2023

(Agencies): Meghalaya deputy chief minister Prestone Tynsong-i National People's Party (NPP) Meghalaya unit nung president inyaksü shimogo.

October 31, 2023 nü Tynsong-i MP WR Kharlukhi ket nungi Meghalaya NPP president mapa melenzükogo.

Shillong nung aliba NPP office nung sentong ka agidang Tynsong-i Meghalaya NPP president melenzüka liasü.

"WR Kharlukhi-i küm 16 tashi president inyaka aruogo aser ozü lennir Purno A Sangma



Prestone Tynsong

dang nungi Kharlukhi-i NPP nung mapang talangtiba züñgsem ka ama aruogo" ta Meghalaya chief minister Conrad Sangma-i ashi.

Pai küm aika NPP asoshi mapang bendang agütsüba aser shilem tajung agiba atema kanga pelar, ta Conrad-isa ashi.

"Prestone Tynson-i state politics nung aika ajangshia aruogo aser pai Dr Kharlukhi ket nungi mapa melenzüksü. Pa lenisüba kübok NPP-i Meghalaya aser Northeast nung mapa tuluba inyaka aotsü aser pa lenisüba nung onoki tamang akar" ta paisa metetdaksü.



Gaza nung pua alir mesüra samar alirtem noksa Tel Aviv nung jara ka nung yua aliba Israel tsür kati repringba noksa nung angur. October 7 nü Hamas-i Israel maka tenzükba rara tatem kati maruteti lir aser nüburttem timtemteper.

Indonesia nung Tir election minprongtsü merangba atema nisung 59 apu

Jakarta, Mongputeni/ October 31 (Agencies): Taruba küm tir election mapang miprong agütsütsü atema tasa asar asütsü ta temulung melemi bilemba telok nungi züngsem ishika Indonesia ketdangsürtemi puogo, ta police-i metetdaksü. Police-i nisung 59 apu aser parnok ket nungi prangbong injangtem, propaganda material aser bomb yangludang amshiba chemical tem pua liasü, ta Indonesia indang Counterterrorism Special Detachment 88 unit otongdar-i Mongolbarnü ashi. "Parnok atema election ya democracy nung shilem ka lir anungji democracy ya tai lir. Parnok atema Democracy ya liasü shirnok al-Qaeda den temzüng ozüing alema lir," ta otongdar Aswin Siregar linük yimtiba Jakarta nung osangbenertem den sensaksema mapang ashi. "Parnoki security forces amaktsü asoshi sentong yanglu liasü, shirnok election inyakyimtem kümzüka ayutsü atema rangloker inyakdar." "Item nisungtem apuba ya domestic security minprongtsü inyaksangshiba Densus 88-i khenyongi magizüktsü ta tekümdangtsü ka ama agitsü imlar," ta paisa ashi. Police temi pua alirtem rongnung nisung terteku Jemaah Islamiyah (JI) network nungi

Scarborough Shoal anasa senzütsü onok temeden lir: Philippines

Manila, Mongputeni/ October 31 (Agencies): Philippines-i ashiba agi, South China Sea kübok Scarborough Shoal temeket nung parnok indang rongtem inyaksangshitsü asoshi temeden lir. Rongtem iba tesemi ozüing alema ait ta Beijing-i ashiba sülen Philippines-i iba telangzüba agüja liasü. "International temzüng ozüing kübok Bajo de Masinloc densema West Philippines Sea nung patrol asütsü atema Philippines temeden lir," ta National Security Adviser Eduardo Ano-i Mongolbarnü melena Philippine tenüing amshia liasü. China-i Hombarnü sangdong ka ajanga Philippines indang military rong ka Scarborough Shoal anasa tzüyim-i ozüing alema ai ta ashiba dak sendakba nung telangzüba agütsüba mapang Ano-i iba olen lemsatapa liasü. 2012 küm ita ka shi mangatettep adokba sülen Beijing-i iba tesem ya Manila ket nungi rakzüka liasü. Iba asetkong ya Philippines tzüküm nungi km 220 pilar lir aser international maritime kübok parnok indang exclusive economic zone (EEZ) küboki

GOVERNMENT OF NAGALAND
OFFICE OF THE DEPUTY COMMISSIONER
 KOHIMA : NAGALAND
 Phone No.-0370-2290355, Fax No.0370-2292285
 E-Mail No: dckma-ngl@nic.in

ADVERTISEMENT

NO.DCK/ESTT-16/2013(Part-1) Consequent upon the approval of the Commissioner, Nagaland vide letter NO.CNE/DLRB-DA(MTS&DB)/2022(Pt-1)/2355 Dated 13/01/2023 and lifting of ban on appointments of Grade-IV vide OM No.AR-5/ASSO/98(Vol-1) Dated 27/05/2022, applications are hereby invited from eligible candidates of Indigenous Inhabitants of Kohima District for the post of Grade-IV (Multi Tasking Staff) under District Administration, Kohima, in the Pay Level - 1 of the Pay Matrix under 7th ROP.

Sl. No.	Category of Post	No. of Vacancy	District
1.	Grade-IV (Multi Tasking Staff)	2	KOHIMA

Qualification Criterias

- Should be an indigenous inhabitant of Kohima District.
- Land ownership claims as per Standing Government order.
- Minimum age - 18 years and maximum age - 35 years, as on 30-11-2023.
- Age relaxation for regular Govt. employees shall be allowed as per existing norms.
- For Candidates who are Government Employees and still serving are required to submit "No Objection Certificate" duly signed by the Head of the Department with name and Office Seal along with date of appointment.

Applications Forms can be collected from the Office of the Deputy Commissioner, Kohima w.e.f 01-11-2023 during Office Hours.
 The last date for submission of application form is 30-11-2023.
 Interview date will be intimated at the time of submission of forms.

Sd/-
(KUMAR RAMNIKANT) IAS
 Deputy Commissioner
 Kohima: Nagaland

Pakistan-i ozüing alema arur alirtem mintoktsü

Islamabad, Mongputeni/ October 31 (Agencies): Afghanistan nunger million 1.7 densema ozüing alema Pakistan-i arur alirtem meyipa aotsü atema tetuyuba agütsür aliba anogo tatembang ka dangi aruba mapang Pakistan, interim Interior Minister Sarfraz Bugti-i Hombarnü ashiba agi, caretaker sorkari item nisungtem parnok sasa linük toktsür mora shilem balala küma lemsar yoktsü. Pakistan-i iba ita sangdong ka ajanga, October 31 nü tashi nung ozüing alema linüki arur alirtem ajak meyipa yoktsü ta shiogo. "November 1 nü state-i ozüing alema linüki arur alirtem shilem balala küma lemsar yoktsü," ta Bugti-i ashiba Express Tribune osang kaket ajanga metetdaksü. Bugti-i ashiba agi, taoba anogo asem tsünga bendanger 20,000 dak temai linük toktsürogo. Paisa, ozüing alema linüki arur alirtem anema jenjang agiba mapang provincial sorkar ajaki tongtibang shilem agitsü nüngdaker, ta ashi. Interim interior minister-i, bendangertem ya shilem balala küma lemsar mintoktsü aser senzüsenpongsü atema kuli kaket bena malirtem mezüngbuba shilem nung pei linüki meyipa yoktsü, ta ashi. Bendangertem shirnok

GOVERNMENT OF NAGALAND
DIRECTORATE OF TECHNICAL EDUCATION
 NAGALAND, KOHIMA

NO.DTE/SCHO-10/2019 **Dated: Kohima, Oct 2023**

NOTIFICATION

This is to inform all the Students belonging to Schedule Tribes of Nagaland pursuing (Diploma/Undergraduate and Post graduate courses in Engineering & forestry course (both fresh and renewal) within India, recognized by All India Council for Technical Education (AICTE) to complete Scholarship online registration for the session 2023-2024 w.e.f 2nd November 2023 to 2nd February 2024, through the Common Scholarship Portal. www.Scholarship.nagaland.gov.in

Sd/-
(Er. VIPULHOU LHOUNGU)
 Director

56buba CHSS asayamung tenzükogo



Dimapur, Mongputeni/October 31 (TYO): 56buba Christian Higher Secondary School Dimapur Annual Games & Sports Meet 2023 October 31 nü Nagaland Cricket Association, Honorary Secretary Hyunilo Anilo Khing-i school ground nung tenzüksüogo.

Sentong nung o jembiba mapang Khing-i, saisapong koda tongtibang aser iba ajanga lanurtem nem maongka agütsüba indang lemsatop. Paisa, saisapong ya ajak dang tanobusang saka industry tem rongnung kanga danga kara renloka aoba industry ka lir aser iba asoshi sorkar aser corporate house temi kanga bendanga agüja inyaker aser iba ajanga lanurtem taküm melenshitsür, ta ashi.

Khing-isa, Nagaland Olympic Association aser CM

lenisüba nung Nagaland sorkari konang nüngsa bener arutsü atema Nagaland nungi asayartem asoshi bendanga agüja inyaka arudar, kong tawa Asian Games nung Naga nung asayartem shilem agiba densema lir ta ashi.

Maneni Khing-i, cricket asaya grassroot level nungi ajungkettsü atema NCA-i jenjang agibatem kar lemsatopa liasü. NCA-i state kübok district ajak ayimjema concrete cricket pitche 60 shi yanglutsüogo aser cricket asayartem lokti tentet ka tentettsü asoshi Super Masters League ka tenzükogo, koba ajanga taoba mapang asayartem ajak longjemdaksütsü, ta ashi.

Sentong nung Fr. Jt. Secy aser Tournament Convenor NCA Ahidur Rehman mejeta jaoker ka liasü aser pai

kaketshirtem dang cricket asaya ya parnok indang career ka ama kümdaksütsü ajungshiba den tsürapur aser school-i item asayartem nongita yaritsüla ta ashi. Paisa, Mughavi Wotsa aser Tahmeed Rehman nung national level nung first class cricket asayaba indang tatischitsü bener arua jembiba.

October 31 nüsa tongti tejaokeri NCA ketdangpurtem matsüngdang cricket practice pitch ka lapokja liasü.

Asayamung lapokba sentong nung sobaliba aser modern tsüngsang, taekwondo demonstration aser primary class kaketshirtem arr atsütepba asaya amala densema liasü. Sentong nüngsa Principal CHSS Moatemsu Walling-i tepela o jembiba aser Razounuo-i tetenzük aser Jolly Jami, Chaplain-i tatembang sarasadem agia liasü.

Pro Tennis League 2023: Adkar aser Khade nati point timba angu

Mongputeni/October 31, 2023 (Agencies): Pro Tennis League 2023 auction nung tetsür aser tebur category nung Vaishnavi Adkar aser Arjun Khade nati point timtiba nguogo. Auction ya Honibarnü New Delhi nung RK Khanna Stadium kübok Davis Cup Lounge nung agia liasü.

Iba tennis league ya tang agi pongubenbuba asayatsü lir, kong tang asaya alirtem den lanur asayartem aser taoba mapang professional temi shilem agiba angutsü aser lanurtem atema maongka tajung ka lir.

Men's Pro, Women's Pro, Next-Gen Men's aser Next-Gen Women's category atema auction nung asayartem shimba mapang team shia nem virtual budget 1,00,00,000 points agüja liasü. Kasa mapang nung auction magi tsüngda team ajak nem Master Player kaka agüja liasü.

Vaishnavi Adkar ya point lakh 44 agi Mumbai Acers nung denogo. Lucknow Aviators,

Indraprastha Warriors, Paramount Proec Tigers aser Mumbai Acers nung toktepba sülen India nung asayartem rongnungi kija asaya nung top-20 aser tarep nung No 17 nung alila ya Acers den denogo.

Tanga asayartem rongnung Sravya Shivani Chilakalapudi atema Paramount Proec Tigers puri point lakh 40 intok aser Sankara Stag Babolat Yoddhas puri Riya Bhatia atema point lakh 35 intoka liasü. Taoba küm auction nung Bhatia atema point timtiba intoka liasü.

Tebur professional asayartem rongnung Khade atema point timtiba intokogo. Pa atema Sankara Stag Babolat Yoddhas puri point lak 41 intoka liasü. Linük nung kija asaya nung jenjang 17 nung aliba asayar ya Mukund Sasikumar (38.5 lakh points) aser Karan Singh (36.5 lakh points) nung amala tejen asayartem dang nungi point timtiba agi shimba ya imla-a maliasü.

Paramount Proec Tigers, Lucknow Aviators, Sankara Stag Babolat Yoddhas, Mumbai Acers aser Rebound Ace nung Khade atema toktep aser tatem nung Jodhpur-Meerut nung amendaker aliba Sankara Stag Babolat Yoddhas team-i koka liasü.

US Collegiate star aser India indang top-20 asayar Siddhant Banthia atema-a point aika intoka pa Mumbai Acers nung point lakh 36 yong denogo.

Next-Gen category nung Delhi's Road to PTL akoksang Vansh Bisht Sankara Stag Babolat Yoddhas nung aden, Mumbai's Road to PTL champion Arush Nitture Mumbai Acers nung aden aser women's Road to PTL winners Gauri Mangaonkar aser Somya Arya na Rebound Acers aser DMG Delhi Crusaders nung denogo.

Pro Tennis League season pongububa ya December 7 nungi 10 tashi RK Khanna Tennis Stadium, New Delhi nung asayatsü. Semifinal aser final December 10 nü asayatsü.

NFA-i football asayar 14 merenshiba sangdong

Mokokchung, Mongputeni/October 31 (TYO): Disciplinary Action Committee-i bushisüngdangba osang dak ajemdaker football asayar parnok 14 nem November 1, 2023 nungi tenzük sangküm March 31, 2024 tashi ita pungu (5) atema Nagaland Football Association kübok ayongba asayamung ajak nung tenoktangba agütsür, ta NFA-i yokba sangdong ka ajanga metetdaksü.

Temerenshi agütsür asayartemji - Merensang, Nyithong Magh, Kekhrie Tsira, Sinlo Kent, Hekato, Hoatinmang Thomsong (Victor), James Kithan, Temjen Longkumer, Kevisalie Sechu, Petevizo Kezie-o, Rhitso Mero, Lalourieyang Pamei (Aloumai), Wang Renta aser Benrithung parnok ya lir.

Kechi atema parnok ya merenshi, iba indang kulijibo kecha shia maliasü.

MDFA: Moanungsang Memorial Sporting Club final-i iogo



Tanü MDFA Trophy mezüngbuba Semi Final Moanungsang Memorial Sporting Club aser Super Seniors tsüngda asayaba mapang tangokba noksa angur.

Mokokchung, Mongputeni/October 31 (TYO): Imkongmeren Sports Complex Mokokchung nung tanü October 31 nü MDFA Trophy mezüngbuba Semi Final Moanungsang Memorial Sporting Club aser Super Seniors tsüngda asayaba nung Moanungsang Memorial Sporting Club teloki goal 2-0 agi Super Seniors telok kokteta MDFA Trophy 2023 Final asayatsü.

Tanü iba asaya nung anisüngzük mapang tashi nung telok katia goal magütsütet, saka anisüngzükba mapang agir kelen asayayonga aodang minute 60 buba nung

Moanungsang Memorial Sporting Club telok nungi jersey no 19 Rongsenchiba-i goal ka yoka liasü aser iba sülen ano par telok nungisa minute 88 buba nung jersey no 06 Molutsüpongia goal ka yokteta item goal ana jagi Moanungsang Memorial Sporting Club teloki Super Seniors telok kokteta MDFA Trophy 2023 Final asayatsü maongka ngutetogo.

Tanü iba sentong nung Match Patron 12 Assam Rifles Comandant Col. Rahul Gurung Kirti Chakra liasü

01-11-2023 MDFA Trophy 2nd Semi Final Fixture 1:00 Pm --- Telongjem FC Vs KSR Team

Australia-i 2034 FIFA World Cup atema bid masütsü

Mongputeni/October 31, 2023 (Agencies): 2034 men's FIFA World Cup atema bid asüba nungi Australia atsünginogo aser iba ajanga Saudi Arabia nem lenmang lapoktsüogo.

Football Australia-i October 31 nü tatembangbuba anogo iba telemtetba agia liasü. Asian Football Confederation-i Saudi Arabia pusemba sülen Australia atsüngina liasü.

"Onoki lenla ajak asadangogo aser 2034 kübok FIFA World Cup ayongzük asayatsü atema bid asüba nungi atsüngintsü asoshi telemtetba agiogo," ta Football Australia-i

sangdong ka ajanga metetdaksü.

Morocco, Spain aser Portugal nung 2030 World Cup asayatsü sangdongba sülen FIFA-i World Cup ayongzüksü atema Asia aser Oceania region nungi linüktem jaoka liasü.

2034 World Cup külemi host asütsü atema Indonesia aser Australia na sensaksema liasü saka Indonesia-i tawa Saudi Arabia pusemba sangdongogo.

Iba tetoktepba nungi atsünginba sülen Australia tang 2026 küm Women's Asian Cup aser 2029 FIFA Club World Cup ayongzük asayatsü asoshi rangloker inyaksangshitsü.

BILEMDANGANG

"Nai jenjang tila ka dang agiaka ibajagi temelenshi adoker ta metetang."